



**VAN HUFFELEN A EVALUA UN AÑA DI ACUERDO DI COOPERACION ENTRE CUATER PAIS: KICO A LOGRA Y KICO TA SPERA**

**WWW.SOLODIPUEBLO.COM**  **SOLODIPUEBLO@GMAIL.COM**

El a wordo deteni den sala di Corte  
**COACH DI TEAM DI BASEBALL  
CONDENA NA 6 AÑA DI PRISON PA A  
ABUSA DI DOS MUCHA HOMBER**



Paul Croes tabata hopi emocionada y cu wowo yen awa  
**CASO KITAMENTO DI PERTENCIA DI PAUL  
CROES TRATA DEN CORTE SUPERIOR**



**VAN HUFFELEN A KEDA IMPRESIONA  
PA E AVANSANAN DI REFORMA NA  
ARUBA: "INDRUKWEKKEND"**



**PROME MINISTER TA FELICITA  
MINISTER ENDY CROES CU UN  
LOGRO MAS PA DEPORTE**



**A RICIBI BISHITA DI SECRETARIA  
DI ESTADO SRA. ALEXANDRA VAN  
HUFFELEN Y DELEGACION DI TWO**







# Noticia di Corte

**Paul Croes tabata hopi emocionada y cu wowo yen awa**

## **CASO KITAMENTO DI PERTENCIA DI PAUL CROES TRATA DEN CORTE SUPERIOR**

Awe merdia 2'or, Hof di Corte Superior a trata e apelacion di Paul Croes contra e sentencia di 2 December 2021, caminda Hues a hay'e culpable di labamento di placa y a ordena cu Paul Croes mester paga mas 83.489 florin of 1 aña di prison.

SOLO DI PUELBO por a compronde cu e biaha aki Paul Croes a presenta den Corte.

### **PG A EXIGI PA MANTENE SENTENCIA**

Procurador General (PG) a bisa Hof cu Ministerio Publico kier pa mantene e decision di Hues di Corte den Promer Instancia. PG a muestra cu na November 2023, abogado mr. D.Croes a pidi pa scucha testimonio pa muestra e placanan cu a haya pa asina muestra cu no tabatin labamento di placa. Hof a dicide pa manda cartanan y no ta necesario scucha testimonio. PG a muestra cu abogado a bisa cu tabatin bendemento di pannan yena y otro cosnan pa yega na placanan. PG a bisa Hof cu e no ta haya e declaracionnan confiabel. PG a muestra cu ta papia di bendemento di headpiece pa carnaval cu Melony a traha pero no ta splica na kende e placanan a wordo paga. PG ta haya cu e placanan aki ta na beneficio di e grupo di carnaval. E trahamento di pannan yena cu Melony a traha tambe no tin claridad. PG ta haya cu Belasting mester check entradanan apart. PG a sigui bisa cu tambe ta papia di bendemento di puppy's na balor total di 14 mil florin. El a remarca cu si haci calculacion, ta 8 puppy y mey a wordo bendi si ta papia di algo mas di 1700 florin pa puppy. PG a conclui cu Hof mester mantene e sentencia.

### **ABOGADO**

Mr. D.Croes a bisa Hof cu despues di eleccion 2013, Paul Croes bira minister. El a casa y tabatin regalonan di placa di casamento. Na 2014, a haci denuncia contra Paul Croes. Riba orden di Ministerio Publico, a haci investigacion na cas di Paul Croes na 2017 dos biaha y a confisca cosnan. Paul a keda 80 dia encarcela y despues laga liber.

### **MEDIA PA CASTIGA PAUL CROES**

Na opinion di mr. Croes, tabatin un circo den medio cu e caso aki. E ta haya cu Paul Croes a wordo suficiente castiga door di media. E abogado ta haya cu Hof mester rechaza e sentencia pa kita

pertenencia. E abogado a cuestiona e forma con media a afecta Paul Croes. No a tene cuenta cu no por pinta Paul Croes scur promer cu e haya condena. Na opinion di mr. Croes, den media social, caso Avestruz a haya mas o menos 13 mil hits, caso IBIS di Paul Croes tin mas cu 1.8 miyon hits. E abogado cu un monton di documento den man di publicacionnan cu a sali di Paul Croes a muestra Hof di un parti di e publicacionnan. El a muestra riba e conferencia di prensa di Ministerio Publico tocante Paul Croes. Tambe a transmiti pa promer biaha caso Paul Croes via Corte den Piedra Plat Entertainment Center. Esaki cu e intension cu Paul Croes mester wordo colga. E ta haya cu no a tene cuenta cu esaki den e castigo compara cu caso Avestruz.

E abogado a bisa Hof cu ta pa promer biaha den historia cu ta investiga un minister. E ta haya cu Ministerio Publico no a sigui e procedura corecto y pesey mester declara Ministerio Publico no admisibel.

E abogado a menciona cu a surpasa e periodo pa cu e caso. El a menciona EVRM (Derechonan Humano) caminda ta muestra riba e periodo husto di proceso hudicial cu ta 2 aña. Na opinion di mr. Croes, den caso Paul Croes a surpasa esaki hopi. El a menciona cu Corte Supremo ta muestra cu mester compensa ora surpasa e periodo, door di baha e cantidad cu mester kita di pertenencia. E ta haya cu mester desconta cu 10 mil florin.

E abogado a muestra cu na regalo di casamento, e pareha a haya mas cu 67 mil florin. E bendemento di 7 puppy, bendemento di pan yena, bendemento di headpiece. Tur esakinan ta yega na 142,600 florin cu mester desconta for di e mas cu 183 mil florin cu a ordena pa Paul Croes paga of kita di pertenencia. E ora ey ta resta, algo mas di 46 mil florin.

Abogado a bisa Hof cu Paul Croes a keda financieramente afecta. A kit'e como minister y despues como empleado di Gobierno. Ademas Paul Croes mester a haci casi 250 mil florin gasto na asistencia di abogado. Mester a huur su cas RB&B pa asina por genera placa. Actual, Paul Croes ta sintando castigo di 3 aña den KIA.

### **CASTIGO NO HUMA**

E abogado a bisa cu pa 80 dia Paul Croes tabata sera su so. Segun regla di Nacionnan Uni, e maximo ta 15 dia. E unico bishita cu Paul Croes tabata haya ta di djaca y cancrew. Na opinion di mr. Croes, esaki tambe ta violacion di reglanan di EVRM, cu ta bisa cu e lugar mester ta higienico. El a muestra cu tin raportnan cu ta muestra cu KIA no ta apto. E abogado a bisa Hof cu Croes a wordo sera den e seccion di hendenan cu problema mental. E famia a keda afecta door di e caso aki. E abogado ta haya cu teniendo cuenta cu tur e sancionnan menciona, Paul Croes no ta den e posicion di paga e suma cu Corte ta ordena pa paga. E lo mester bay traha den sector priva y mirando tur e publicacion contra dje, ta bira hopi nivel. Abogado a pidi Hof pa haci e suma nihil of pa baha esaki drasticamente.

PG a bisa cu loke abogado a bisa ya a wordo treci padilanti den e caso penal, cual a wordo rechaza. PG ta haya cu Ministerio Publico no a surpasa e periodo stipula pa ley. Ta asina cu tin beslag pone riba cas di Paul Croes for di 2018.

### **PAUL CU WOWO NA AWA A PAPIA**

Paul Croes a bisa Hof, cu despues di 16 luna atrobe e ta para dilanti Hof. No ta nada facil. El a bisa cu 7 aña a afecta e y su famia nan bida. E ultimo 13 luna e ta mas mas afecta, door cu e ta sera den KIA sin su famia. Segun Paul Croes, ta promer biaha den historia cu un politico ta sera. Ariba pregunta di Hof, el a splica con el a pasa 80 dia sera, sin por a haci nada. E no por a haya ni bijbel pa lesa. Ademas e tabata sera den un seccion pa hendenan cu problema mental.

El a bisa cu e situacion den KIA no ta bon. El a invita Hof pa djis haci un bishita. El a bisa cu e lugar no ta higienico y cu tin mas o menos 60 pussy ta cana rond. Tin masha hopi paloma y tur e sushi ta bin den e celnan. Ainda e falta 8 luna mas den KIA.

Paul Croes kier a lesa un carta cu el a skirbi pero su emocionnan a subi y wowonan a yena cu awa. El bisa Hof cu ta keda na Hof pa determina cuanto mas e lo mester keda sufri. Hof a sera tratamento di e caso y a bisa cu dia 2 Mei 2024 pa 2.15 lo dicta sentencia.



# VAN HUFFELEN A KEDA IMPRESIONA PA E AVANSANAN DI REFORMA NA ARUBA: "INDRUKWEKKEND"

Den un bishita recién na Aruba, e secretario di estado Hulandes, Sra. Van Huffelen, a papia tocante e avance di reforman den enseñansa y cooperacion entre Hulanda y Aruba. E bishita a enfoca riba e evaluacion di un acuerdo di cooperacion entre cuater pais, incluyendo Aruba, ku a ser firma un año pasa cu komo meta pa pone reforman conhunto pa reforsa e paisnan.

Durante su estadia, Sra. Van Huffelen a papia cu diferente minister, incluyendo e minister-president, e minister di Finanzas y e minister di Enseñansa Sr. Endy Croes.

E conbersacionnan a enfoca riba e necesidad di reforma y e implementacion duradero di nan. E meta no tabata solamente pa discuti e resultadonan logra, pero tambe pa plania pasonan futuro pa mas progreso.

Topiconan importante cu a surgia inclui reforma fiscal, mehoracion den cuidio medico, restructuracion di gobierno y inversionnan den enseñansa. Tocante enseñansa a enfatiza cu enseñansa di calidad ta esencial pa desaroyo di un pais. A papia tokante di subi e calidat di enseñansa, mehoracion di materialnan di les y optimisacion di

conexcion entre enseñansa y mercado di trabou.

Un aspecto importante di e reforman den enseñansa tabata e discucion tokante e lenga di instruccion. A keda acorda cu enseñansa ta cuminsa na Papiamento, sigui pa Hulandes como di dos lenga, mientras idioma di Ingles y Spaño ta como lenga stranhero. E enfasis aki ta pa reforsa e habilidad di lenga di e studiantenan y preparanan pa un sociedad multicultural.

Ademas, a papia tocante di e retonan na momento di transicion di enseñansa secundario pa enseñansa superior, específicamente



pa estudionan HBO na Hulanda. E esfuerso ta pa hasi e transicion aki mas suave y mehora e conexcion.

Un otro pùnto di discucion tabata e financiamiento di enseñansa. A confirma cu tin 30 miyon Euro disponibel anual pa

proyectonan di enseñansa den parti Caribense di Reino, incluyendo Aruba.

E financiamiento aki ta ser distribuí pa diferente proyecto y ta pa mehora e calidad di enseñansa y promove acceso na enseñansa.

## MINISTER ENDY CROES Y MINISTER GEOFFREY WEVER A FIRMA UN MOU CU STENDEN UNIVERSITY



ORANJESTAD: Dia 11 di maart ultimo, Minister Endy Croes a reuni cu e representantenan di NHL Stenden University. E universidad ta situa na Leeuwarden, Hulanda y ta traha cu hopi universidad rond di mundo. Recientemente,

Universidad di Aruba a firma un "Memorandum of Understanding" (MoU) pa, entre otro, e programa di intercambio "Gran Tour" cu lo inicia na luna di september proximo. E programa aki ta brinda e studiantenan di año tres di e estudio



"Hospitality Management" e oportunidad pa studia un semestre na Aruba.

E studiantenan aki lo hospeda den nos centro di ciudad cu e vision pa crea mas movicion y bida na Oranjestad. E intercambio aki lo sosode dos bes pa

año, den luna di september y februari.

Dia 11 di maart ultimo, Minister Endy Croes hunto cu colega Minister Geoffrey Wever a firma un otro acuerdo pa traha di cerca den colaboracion cu e "beroepsscholen", entre

otro, Colegio EPI. Minister Endy Croes a indica cu den luna di april proximo e representantenan di NHL Stenden University lo ta na Aruba un bes mas pa firma un MoU cu Colegio EPI.





# Noticia di Corte

El a wordo deteni den sala di Corte

## COACH DI TEAM DI BASEBALL CONDENA NA 6 AÑA DI PRISON PA A ABUSA DI DOS MUCHA HOMBER

ORANJESTAD – Awe mainta e homber R.(51) a presenta na Corte di Husticia pa scucha su sentencia. E ta wordo acusa di, como coach di un team di baseball, a abusa di dos mucha durante 2014 y 2016.

SOLO DI PUEBLO por a compronde cu Hues a confirma e exigencia di Fiscal esta 6 año di prison y a duna orden pa detene R. di biaha den sala di Corte

### FISCAL A EXIGI 6 AÑA DI PRISON

Tres siman pasa tratamiento di e caso a tuma lugar caminda Fiscal a muestra cu R. ta wordo acusa di en total 6 acusacion, 3 di cada un di e muchanan. E abusonnan ta encera, mishimento, actonan immoral y penetracion di e muchanan di parti patras. E lamentable casonan aki mester a sosode entre 2014 y 2016. R. e tempo ey tabata liber y a presenta den Corte pa tratamiento di e caso. Ta asina cu e dos muchanan ta famia di e defunto señora di R.

E caso a bin na claridad ora cu na Juni 2023, e dos hobennan a bay Polis pa haci denuncia. E dos hobennan a declara cu nan tabata hunga den e team di R., kende tabata encarga cu un team di muchanan entre 7 y 9 año y un team di muchanan entre 13 pa 15 año. E mayornan di e dos victimanan tabata confia R. pa busca e muchanan y hiba nan train of trece nan cas. E hobennan a declara cu R. tabata hiba nan na su cas y abusa di nan. E abusonnan tabata encera cu R. tabata mishi cu e muchanan y pone e muchanan chupa su parti intimo, despues e ta chupa di nan. Despues e tabata penetra nan di atras. Cada abuso tabata sosode separa o sea un biaha ta un y otro biaha tabata e otro. E tempo ey, un di e victimanan tabatin 9 pa 10 año, mientras cu e otro tabatin 8 año. Ta asina cu e muchanan a presenta daño per juico contra R. pa tur e abuso cu nan a sufri. Ta asina cu un di e hobennan a bira malo y mester a haya tratamiento na Respaldo.

Durante tratamiento di e caso Hues a muestra cu R. a desmenti categoricamente na Polis y den Corte di e acusacionnan. El a bisa cu tur esaki ta un gañamento pasobra e famia di e

banda di su difunto señora no tabata gust'e of sali bon cun'e.

Fiscal a bisa cu e dos victimanan a conta detaya kico tur a sosode y Fiscal ta haya cu no tin motibo pa duda. Fiscal a exige 6 año di prison pa R. y a pidi Hues pa aproba 15 mil florin di daño pa cada mucha. Tambe Fiscal a exige pa detencion di biaha di R., pero Hues a bisa cu dia di sentencia lo e dicidi riba esey.

### SENTENCIA

Hues a bisa cu e ta rechaza e defensa di abogado cu no tin prueba. Hues a muestra cu R. a mishi, haci actonan immoral y abusa sexual di dos mucha. Hues a muestra riba declaracion di un di e victimanan kende a bisa con R. a invit'e pa bay su cas y a abusa di dje. E otro victima, durante entrenamiento den cuartel militar a conta su Corporal cu el a wordo abusa door di un coach di baseball.

Hues a muestra tambe cu un di e victimanan mester a haya tratamiento na Respaldo y eynan el a conta kico tur a pasa cun'e. Hues ta haya cu e declaracionnan aki y e declaracion di mayornan di un di e victimanan confiabel. Hues a bisa cu e no tin motibo di duda den e declaracionnan.

Hues a bisa cu e ta haya cu tin pruebanan cu R. a abusa di 2 mucha kendenan tabata entre 8 y 12 año, siendo cu nan ta famia y R. tabata nan coach di baseball. Hues a sigui bisa cu R. a abusa di nan den su camber. Esaki a sosode diferente biaha. Hues a bisa cu R. a bisa cu e no a abusa di e muchanan pero Hues no ta kere R. Hues a bisa cu e ta haya tur acusacion proba.

Pa cu e castigo, Hues a bisa cu e ta tene cuenta cu ta un caso hopi serio. Durante un periodo largo R. a abusa di dos mucha cu tabata na su encargo como coach. Hues ta haya cu R. no a tene ningun momento cuenta cu e sentimento di e muchanan sino a probecha di nan pa satisfice su mes. Hues ta haya cu R. a tacha e integridad di e muchanan.

Hues a bisa cu experiencia a muestra cu victimanan di abuso lo por keda pa hopi tempo afecta. Den e caso aki a resulta asina tambe. Hues a tuma R. na malo pa esaki. Hues a bisa

cu loke ta pisa mas den e caso aki ta cu R. a penetra e muchanan di patras y pa un periodo largo.

### CASTIGO

Hues a confirma e exigencia di Fiscal y a condena R. na 6 año di prison, kitando e tempo cu e ta sera den KIA. Tambe Hues a duna orden pa detencion di inmediato.

Hues a ordena R. pa paga daño di algo mas cu 17 Mil florin, e resto el a declara no admisibel y cu e famia lo por cuminsa un caso civil. E mesun cos el a dicidi pa e otro victima. Hues a bisa cu e ta pone medida di pago pa cada un di e victimanan y si R. no paga, pa cada un e lo mester bay mas cu 300 dia sera. Despues di e sentencia, miembronan di CEA a bay riba R. y a detene y hib'e patras pa asina e wordo hiba KIA pa e sinta su castigo.

**LUNCH MENU** **OKÉ TAKE AWAY**

SANTA CRUZ 36




**-MIXSEAFOOD STOBA**

**-BACALAO FISHCUTLET**

**-CURRY CHICKEN**

**-SPAGHETTI CU CARNI MULA**

**\_MINIBOX\_**

**HORARIO: SPAGHETTI CU CARNI MULA**

**11:00AM- 3:00PM ☎ 746-3571-- 565-3232**



# VAN HUFFELEN A EVALUA UN AÑA DI ACUERDO DI COOPERACION ENTRE CUATER PAIS: KICO A LOGRA Y KICO TA SPERA

E ultimo aña a marca un punto importante pa e cuater paisnan cu a firma un acuerdo di cooperacion, incluyendo Aruba. E acuerdo, cual ta enfoca riba implementacion di reformanan pa reforsa e paisnan partisipante, ta na e punto di un aña despues di a firma. Esaki ta un momento critico pa wak kico a logra y mira dilanti pa kico nos ta spera den e añanan venidero. Cu e termino di un aña, ta ora repasa e progreso cu a

logra for di e momento di a firma e acuerdo.

E pregunta ta surgi: kico nos a logra den e periodo aki? A alcanza e meta? E reformanan desea a keda implementa cu exito? Esakinan ta solamente algun di e preguntanan cu mester contesta pa bay mas completo den e impacto di e acuerdo di cooperacion aki.

No solamente ta importante pa mira na pasado, pero ta esencial

tambe pa mira dilanti. Cu ainda dos aña pa bay prome cu e termino di e acuerdo, e partidonan mester enfoca riba kico ta resta pa hasi. Kico ta e prioridadnan pa e añanan venidero? Ki retonan ta keda dilanti di nos y con por atende esaki na mihor manera?

Ta claro cu e periodo di evaluacion aki ta un momento crítico pa e paisnan partisipante determina nan curso.



Exito di e cooperacion ta depende di e capacidad di tur partido pa implementa reformanan efectivo cu ta promove estabilidad y crecimiento di e paisnan. Cu un conclusion claro di

kico a logra y kico falta pa logra, e paisnan concierne por traha hunto pa realisa e metanan di e acuerdo y segura un futuro mihor pa tur e paisnan partisipante.

## ADDONSITO TAWATA LIVE DEN NACHT VAN KRO NCRV NA HULANDA



Antesala di Aruba su dia nacional, un di e radionan mas scucha na Hulanda, cu promedio 2.5 miyon scuchado, a invita mener di Geschiedenis Addonsito Croes di Filomena College Mavo, p'e por a duna un splicacion, na Hulandes, di con Aruba a yega na su simbolonan nacional.

Esaki tawata den e nachtprogramma di Radio 1 NCRV KRO di Dj Benji Heerschop.

Addonsito tawatin e honor di splica pa 10 minut un tiki dje historia y nificacion di nos simbolonan nacional, cu ta e himno y nos bandera. E segmento a cuminsa cu un fragmento di nos himno Aruba Dushi Tera.

Den su entrevista, Addonsito a conta con e deseo pa separacion a cuminsa aki na Aruba desde e tempo cu nos tawata forma parti di Colonia Corsou y cu tawata e 2147 firmantenan, na 1948, esunnan cu a duna inicio na Aruba su separacion, bou guia di sr. Shon A Eman dfm. Tambe el a conta con su om sr. Betico Croes dfm. ta esun cu a bini cu e idea pa Aruba por tin su mesun himno y su bandera, inculcando di e forma aki e amor patriotico den nos pueblo. Aki el a stimula mas ainda e deseo pa nos no forma parti mas di Antias Hulandes.

Na final dj Benji a gradici'e cu el a tuma su tempo educando tur scuchado algo di e isla

cu tambe ta forma parti di Reino Hulandes. Ainda

por scucha e entrevista aki na [www.nporadio1.nl](http://www.nporadio1.nl)

fragmenten: Dag van de vlag en het volkslied op Aruba.

### CAREER SPOTLIGHT

BY AHATA



**THEN**

1996  
**HR Clerk & Recreation Health Club / Kids Club Attendant**  
Hyatt Regency Aruba Resort & Casino



**NOW**

2014 - Present  
**Complex Director of Human Resources**  
Marriott Aruba Resorts

RUTHLINE THEYSEN



## Wings of Hope AUA Airport Runway Run 2024

# FORTALECIENDO E COMUNIDADNAN Y INSPIRANDO E FUTURO GENERACIONNAN



Recientemente e team di Wings of Hope (WOH) cu ta forma parti di Aruba Airport Authority N.V. a organisa e di dos AUA Airport Runway Run riba diadomingo 17 di maart 2024, caminda un total di 125 coredo a duna bek na comunidad di un manera inolvidabel.

Den presencia di tur coredo y boluntario, e team di Wings of Hope simbolicamente a haci un donacion di 7.500 florin pa dos fundacion, esta Trampolin pa Trabao y

Funari. Trampolin pa Trabou su meta ta pa haya un trabou pa esnan di 17 aña bay ariba y cu tin un limitacion, door di ofrece nan un capacitacion laboral y "match" nan cliente cu e dunadonan di trabou local cu miho ta complementa nan potencial. Funari ta enfoca riba e integracion social di e personanan cu un limitacion fisico den sociedad pa medio di mantene nan curpa y mente activo.

Pa e di dos edicion di AUA

Airport Runway Run, tur 125 coredo a core un poco mas cu 5K cuminsando desde Runway 11 pa Runway 29 y djey bek pa Runway 11 pa asina yega final. Tur coredo a ricibi diferente gadgets di AUA manera Safety Vest y un Hydration Belt Waist Bag pa haci uzo di dje durante e coremento. Pa finalisa cu e evento, a warda tur coredo na e final cu bebida pa refresca incluyendo coco cu e logo nobo di Wings of Hope. A rifa un total di 32 premio entre e participantenan, e premionan tabata inclui producto electronico, material pa haci deporte, voucher pa salud y bienestar, voucher pa biahe y voucher pa haci trabou den hardin y mucho mas.

Pa honra Wings of Hope su esfuersonan pa ehecuta e proyectonan social cu tin un impacto positivo pa comunidad di Aruba, Wings of Hope a lansa su logo nobo cu ta nifica resiliencia, compasion y progreso. Di e manera aki ta demonstra un promesa pa construi un miho futuro, caminda cada persona tin acceso na cuminda, educacion y oportunidad pa crece guia pa e Sustainable Development Goals di Nacionnan Uni. Wings of Hope lo sigui curasha e comunidadnan y inspira e futuro generacionnan.

AAA y WoH ta sumamente agradecido cu tur voluntario, coredo,



organizacion y e demas gruponan cu a participa den e di dos edicion di AUA Airport Runway Run p'asina haci e actividad aki uno exitoso y inolvidabel.

Tocante AUA Airport

AUA Airport ta un di e aeropuertonan mas ocupa den region Caribe cu mas di 26 diferente aerolinea operando pa Aruba contribuyendo na mas cu 2.8 miyon pasahero pa aña y cu buelonan pa 31 diferente ciudad 45 diferente destinacion non-stop rond di mundo. Di e mercadonan cu AUA Airport ta sirbi 77% ta for di Merca y Canada, 15% for di Latino America, 4% for di Europa y 4% for di Antia Hulandes te cu luna di januari 2024. AUA Airport ta reconoce cu esaki ta danki na e economia stabiel, clima politico,

hospitalidad, poblacion diversifica y siguridad general di nos isla. AUA Airport su aspiracion ta pa bira un aeropuerto sostenibel, sigur y a prueba di futuro, den region Latino Americano & Caribense, brindando un luga di trabou confiabel, facilidad di un aeropuerto moderno y un servicio excelente cu ta e refleha hospitalidad Arubiano, contribuyendo na un futuro prospero pa Aruba.

Haya sa mas di loke ta pasando na AUA Airport door di bishita [www.airportaruba.com](http://www.airportaruba.com) y conecta cu AUA Airport riba [Twitter.com/Aruba\\_Airport](https://twitter.com/Aruba_Airport), [Facebook.com/ArubaAirport](https://facebook.com/ArubaAirport), [Instagram.com/arubaairport](https://instagram.com/arubaairport)

Fecha: 20 di Maart, 2024



## Secretario di Estado:

# PROPOSICION DI EMAN PA UN FONDO DI DESAORYO TA PARCE "KWIJTSCHELDING" Y ESEY NO TA POSIBEL

Durante rueda di prensa a haci e pregunta na Van Huffelen di e proposicion di Mike Eman pa cambia e prestamo den un fondo di desaroyo.

E mandatario Hulandes a bisa:

"Riba e propuesta di lider di oposicion Eman, mester mi confesa cu mi no a ricibi informacion specifico tocante e idea aki.

Si gobierno presenta un propuesta manera esaki,

naturalmente nos lo analis'e.

Aunke mi no conoce e detayenan, ta parse si cu e proposicion ta un "kwijtschelding", cual actualmente no ta posibel.



## Tremendo cooperacion entre nefrologonan di Hospital y ImSan EXITOSO CONGRESO DI RIÑON NA BENEFICIO DI E PASHENTNAN

Tabata mas o menos 11 aña pasa cu a tuma luga e ultimo congreso di nefrologia riba nos isla. A pone man hunto atrobe y e aña aki ONA (Organisacion di Nefrologonan Aruba) a tene un congreso grandi di nivel halto pa tres dia di diferente orador local y internacional. Un congreso interactivo y sumamente importante mirando e desaroyonan riba tereno di nefrologia y e balor agrega pa keda na altura pa brinda cuida di calidad na pashentnan. "Tabatin hopi informacion interesante danki na e diferente oradornan. Ademas, participantenan por a haci pregunta y oradornan a trece diferente 'caso di pashent' pa dilanti cu por a discuti. Mi ta hopi orguyoso di ful e team cu a logra organisa e congreso aki di un nivel di kita sombre," asina Jacco Vroegop, director di Horacio Oduber Hospital (HOH) a expresa.

Topiconan interesante E organisacion ONA ta conta cu diferente especialista nefrologo di HOH como tambe di Instituto Medico San Nicolas (ImSan) esta presidente Mauro Cuba, secretaria Hardjit Kharagjitsing y miembronan Agustin Garcia Sanz, Ali Garcia Marquez, Maria Vargas y Romeo Kock. Hunto nan tabata encarga pa trece oradornan

cu a papia riba diferente topico interesante. A logra trece dies orador internacional pe congreso y uno cu a duna su presentacion di forma virtual. A intercambia diferente informacion tocante di riñon entre otro: presion, importancia di uza data, biopsie, transplante di riñon, diferente malesa cronico di riñon, tratamiento, prevencion y tambe diagnostica pa detecta malesa di riñon na tempo.

Binti aña di transplante di riñon Ademas di tur e topiconan ya caba menciona e specialistanan a dedica extra atencion na e topico di transplante di riñon. Ta conmemora cu 20 aña pasa a tuma luga e prome transplante di riñon pa un pashent Arubiano den exterior. Pues un bunita momento pa corda riba tur esfuersonan haci pa realisa e oportunidad cu esaki a trece pa pashentnan di Aruba. Durante e ultimo añanan a sigui desaroya e proceso y a yuda mas pashent. Durante e congreso a lansa video unda algun pashent cu riñon nobo ta expresa nan storia y nan gratitud. Alabes a tuma un momento durante e congreso pa gradici y reconoce e dedicacion di dokter Romeo Kock pa e 20 aña di dedicacion cu'n bunita plakaat. "Mi ta hopi orguyoso di mi team



di nefrologia y dialisis cu e logro bunita aki, y specialmente dokter Kock pa su pasion pe trabou", Jacco Vroegop ta expresa.

Cooperacion y evaluacion Joel Rajnherc, director di ImSan, a felicita ONA pa e tremendo congreso organisa despues di hopi aña. Rajnherc a expresa cu cualkier congreso di e nivel aki, cu presencia di oradornan experto mundialmente reconoci, ta duna especialista y otro participante local e oportunidad di evalua unda nan ta para den terapia pe pashentnan di Aruba. Comparti informacion, conocimiento y experiencianan ta di inmenso balor den cuida medico. Ta importante pa remarca con un cooperacion entre ambos instituto ta duna su fruto na bienestar di e pashentnan. Joel

Rajnherc a comenta cu den Caribe e problemanan di riñon ta hopi grandi. Aruba hasta ta den e top 10 di mundo y esaki no ta algo bon, pasobra ta algo cu por wordo evita. Pues, un congreso asina aki ta esencial pa nos isla pa mehora e cuida pa nos pashentnan y alabes enfatisa e importancia di prevencion.

Un gradicimento ta bay na tur sponsor local y internacional pa haci e congreso aki realidad. Gratitud tambe ta bay na tur orador, team di ONA y team completo pa e trabou duru pa por a logra haci e congreso aki posibel. E congreso ta un tremendo ehempel di colaboracion medico entre HOH y ImSan. Sin un colaboracion extensivo e congreso lo no tabata uno asina fructifero.



# Minister Endy Croes: A RICIBI BISHITA DI SECRETARIA DI ESTADO SRA. ALEXANDRA VAN HUFFELEN Y DELEGACION DI TWO



**ORANJESTAD :**  
Diaranson mainta, Minister di Enseñansa y Deporte Endy Croes hunto cu Prome Minister Evelyn Wever-Croes a ricibi bishita di secretaria di estado Sra. Alexandra van Huffelen hunto cu ful un delegacion di Tijdelijke Werkorganisatie (TWO) di Hulanda y Vertegenwoordiging van Nederland in Aruba (VNO).

Tambe presente durante e reunion aki tabata directora Anne-Marie Proveyer y directora suplente Sheila Maduro di Departamento di Enseñansa (DEA), kendenan hunto cu e mandatario di Enseñansa a duna un presentacion amplio na e delegacion di Hulanda encuanto enseñansa di Aruba. A trata entre otro, PEN 2023, SDG

4, e vision cu ta enseñansa den transicion 2021-2025. Ademas di esaki, a splica tocante e trabounan cu ta haciendo, en conexion cu e recomendacionnan di e Doorlichting van het Arubaanse Onderwijsbestel. Minister Endy Croes a splica e delegacion tur e trabounan cu a haci caba y cual ta e trabounan cu ta trahando di cerca cu TWO.

Fuera di esaki, a duna nan un splicacion encuanto e trabounan cu ta haci riba nivel di Vierlandenoverleg.

E delegacion a haci diferente pregunta, unda Minister Endy hunto cu Prome Minister Evelyn Wever-Croes y team di DEA a duna contestacion.



Finalmente, secretaria di estado y e delegacion di Hulanda a keda impresionada di e trabounan cu Minister Endy Croes ta haciendo riba tereno di enseñansa.

## Prome Minister Evelyn Wever-Croes: MENSAHE DI PROME MINISTER RIBA DIA INTERNACIONAL DI DOWN SYNDROME

### E aña aki e enfoke ta riba e tema di “End the Stereotypes”

21 di maart mundo ta celebra e Dia Internacional di Down Syndrome. Prome Minister Evelyn Wever-Croes a remarca cu riba e dia aki ta para keto na e echo cu na Aruba por wak cu personanan cu Down syndrome ta hopi inclusivo y a logra hopi caba pero ainda tin espacio pa haci mas pa nan.

E tema mundialmente pa e dia Internacional di Down Syndrome di e aña aki ta “End the Stereotypes”. Esaki kiermeen cu frecuentemente personanan cu Down Syndrome ta wordo generalisa na e manera

cu ta wak nan como un grupo di persona cu tur ta mescos, pero esaki ta incorrecto. Mescos cu tur otro persona, un persona cu Down Syndrome ta diferente na un otro persona cu Down Syndrome. Nan cada un tin diferente talento, pensamiento, habilidad y gusto y nan bida ta hopi parecido na bida di cualkier otro persona.

“Ta p’esey ta bon pa enfoca riba echo aki y asina nos por yuda un persona cu Down syndrome desaroya su potencial completo. Aki na Aruba tin un comunidad

grandi di personanan cu Down syndrome y e personanan special aki semper tin un lugha hopi special den mi curason. P’esey awe mi ta pidi tur ciudadano di nos pais, no subestima personanan cu Down syndrome, no exclui nan di nos bida sino duna nan e trato husto, e trato igual, e trato bunita y tuma tempo pa siña conocenan miho. Wak y admira nan talentonan, nan partinan fuerte y asina yuda nan desaroya nan potencial y asina nan por probecha di oportunidadnan igual na nos pais Aruba. Un Aruba unda tin inclusion di tur persona,



ta un miho Aruba”, Prome Minister a expresa.



**Prome Minister Evelyn Wever-Croes:**

**PROME MINISTER TA FELICITA MINISTER ENDY CROES CU UN LOGRO MAS PA DEPORTE**

**"Nos compromiso ta pa percura cu tur nos hobennan tin mas oportunidad pa distraccion sano, pasobra cada hoben cu ta haci deporte ta un menos pa coy e caminda menos bon"**



ORANJESTAD - Diabierna awor, lo tuma luga e inauguracion di e cancha di basketball completamente renoba den centro di Village na Sanicolas. Prome Minister Evelyn Wever-Croes a expresa di ta sumamente contento di mira proyectonan importante asina wordo cumpli, y ta gradici Minister di Deporte Endy Croes cu a pone su

mente y curason den logra cumpli cu deseo di tur e hoben deportistanan cu ta residencia den centro di village.

Durante su bishita na e cancha, Prome Minister por a aprecia e trabou bunita cu a wordo haci. Un cancha completamente renoba cu e palabranan cu semper Minister Croes ta menciona, na

momento cu e ta referi su mes na deporte, graba riba e piso di e cancha. E palabranan cu ta; "Desire, Discipline, Dedication and Determination", cu na papiamento ta Deseo, Dedicacion, Disciplina y Determinacion. E 4D'nan cu pa Minister Croes ta palabranan di hopi significacion na momento cu ta papia di hobennan cu kier logra cosnan grandi den deporte. E hobennan aki tin e deseo di practica basketball, e disciplina y dedicacion pa practica e deporte, y e determinacion pa ta miho cu nan por ta. Y e cancha aki full remodela, ta duna cada un di nan e oportunidad pa logra nan meta.

Prome Minister a expresa



cu e ta un satisfaccion grandi pa mira cu Gobierno ta logra cumpli cu metanan importante pa e hobennan. E cancha aki ta trece hopi oportunidad pa tur esnan cu ta biba den cercania di e cancha y cu tin un amor pa e deporte di basketball. "Nos compromiso ta, pa percura cu tur nos hobennan tin mas oportunidad pa distraccion

sano, pasobra cada hoben cu ta haci deporte ta un menos pa coy e caminda menos bon.

Mi ta felicita full e barrio di Village cu nan cancha di basketball completamente renoba, y ta gradici di curason Minister Endy Croes pa semper tin nos hobennan den mente", Prome Minister a expresa.

**DAMA CHAUFFEUR NO SA DI UNDA AUTO A BINI PA A BIN DAL RIBA DJE NA CRUSADA DI ROCOCO PLAZA**



Diaranson mainta a drenta informe di un accidente na

e crusada banda di Rococo Plaza, mesora a dirigi un

patruxa na e sitio.

Na yegada di e patruxa a bin compronde cu aki ta trata di un accidente unda e dama chauffeur di e Nissan March biniendo di zuid a bay subi caminda pero a mira unicamente un auto blanco na un distancia y diripiente un Chevrolet Spark a bin dal riba dje.

Afortunadamente ningun hende a resulta herida.








# Terapia novedoso por "corta" HIV for di e celnan infecta

E científiconan di e Facultad di Medicina di e Universidad di Pittsburgh (Merca), a identifica remedi candidato cu por reverti (reverse) e capacidad di HIV, causante di AIDS, pa scapa di e deteccion di e sistema inmunologico y asina eradica e reservorio viral cu no por elimina cu remedi antiretroviral actual.

Precisamente ta e reservorio aki ta loke ta impedi p'e personanan cura completamente di HIV hasta ora cu nan carga viral ta indetectabel durante e testnan standard. "Nos tin remedi excelente antiretroviral cu ta suprimir HIV, pero desafortunadamente ningun no ta elimina e virus. Si un hende cu HIV stop di tuma nan remedi, e infeccion lo reaparece," Thomas Smithgall, autor principal di e investigacion a comenta.

"HIV ta establece un reserva di cel infecta cu ta permanece inactivo hasta den presencia di terapia antiretroviral, escondiendo di e deteccion di e sistema inmunologico. Nos ta kere cu nos a descubri un clave pa desenmascara e deposito ey," el a subraya.

Moleculu clave y travieso Despues di e infeccion pa HIV, e proteina viral Nef a presenta na nivel hopi halto. El a demostra cu e por wordo evita cu e sistema inmunologico destrui e celnan infecta, blokiando



of "scondiendo" e señalnan di e virus den e superficie celular. Sinembargo, Nef ta un obhetivo dificil p'e diseñonan di e remedi nan cu ta anul'e.

"Un proteina manera Nef hopi biaha ta considera no farmacologico pasobra e no tin un luga di union defini p'e accion di e remedi," e autor principal Lori Emert-Sedlak, a splica.

"Nos inhibidornan di Nef existente, cu solamente ta agrega na Nef, ta blokia extremadamente bon algun funcion di Nef, pero no ta afecta otro funcion, hopi di cual ta critico p'e infeccion door di HIV," el a añadi.

Solucion innovador N'e situacion aki, e ekipo di investigacion a adopta un enfoque diferente cu a wordo uza den e terapia di cancer. Pa ultimo biaha a identifica moleculu chikito cu ta agrega n'e proteina Nef, e mesun cu ta acopla

despues na un di dos moleculu cu ta marca e proteina Nef pa su destruccion mediante un proceso celular natural.

E candidatonan n'e remedinan resultante, yama PROTAC, a desencadena e degradacion di Nef y a suprimir e replicacion di HIV den e celnan diana. Fuera di esey, e antigenan di HIV lo a bolbe n'e superficie di e celnan infecta, revelando nan n'e sistema inmunologico pa su destruccion. Di e manera aki, e terapia a muestra señal cu e respons immune por restaura. E resultado a wordo publica diamars den Cell Chemical Biology.

Restauracion di speransa "En general, e enfoque PROTAC a genera hopi entusiasmo den e companianan farmaceutico, pero a dirigi casi por completo n'e proteinan implican den e cancer," Smithgall a expone. "Nos PROTAC dirigi pa Nef ta un di e

similar n'esunnan di HIV Nef."

Di e manera aki, Smithgall a afirma cu e ta entusiasma cu e potencial di Nef PROTAC pa trata algun dia e infeccionnan pa HIV, a adverti cu ainda ta rekeri varios paso importante prome cu por purba nan riba hende. "Haya un moleculu chikito cu ta uni selectivamente na Nef tabata e parti mas dificil," e experto a puntualisa. "Awo nos tin cu sigui padilanti cu e optimalisacion di e kimica medicinal y mira con bon e ta funciona contra e reservorio di HIV den un modelo animal," el a agrega.

## Obituario

Publica serka nos anuncio di fayecimento di bo ser keri.  
Nos tin 2 pakete pa ofrece;

Pakete 1: Anuncio di fayecimento te dia cu e defunto ser dera  
Gradicimento y invitashon pa misa pa 3 dia AFI 250,00

Pakete 2: Anuncio di fayecimento te dia cu e defunto ser dera  
Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

**Pa mas informashon por tuma contacto cu oficina na  
585-9500 of na 741-4554**



# Arya Genser a gana Medaya di Brons den Poomsae na Costa Rica



Esaki tabata prome bi-aha cu Taekwondo Team Aruba a participa den un campeonato internacional di Ranking G2 den Poomsae cu un solo participante y a logra medaya di brons.

Taekwondo Team Aruba no ta bringa Kyorugi so, pero ta haci forma "Poomsae" tambe. E deporte di Taekwondo tin varios aspecto y Taekwondo Team Aruba ta train tur pa asina Aruba por ta bon representa.

Taekwondo Team Aruba tin su director tecnico Master Melvin Rasmijn cu ta controla tur atleta pa dicidi si e atleta ta cla pa representa Aruba den eventonan Internacional.

Miguel Genser a coach Arya Genser na Costa Rica den e President's Cup y ta hopi satisfecho cu e resultado di Arya Genser. Esaki ta e comienso di e carera di Arya Genser. Taekwon-



do Team Aruba tin varios otro evento internacional atleta cu ta preparando pa den Poomsae.

## ORACION DI DIA



**Un feliz dia yena di bendicion y colma cu hopi fe y confiansa den nos Bon Dios**

El a bisa nan:..... "Pakico boso tin tanto miedo asina? Ainda boso no tin fe?" (Marco 4, 40)

Confiansa. Un palabra cu nos conoce bon. For di chikito nos a siña confia nos mayornan. Sin pensa, di biaha nos ta kere nan, pasobra nos sa cu nan ta stima y cuida nos. Segun cu tempo pasa, nos ta crece y ta topa hende den nos caminda di bida cu kisas a defrauda nos. Nos ta cuminsa duda den e sinceridad di hende. Y perde confiansa y speransa den Dios. Tambe nos tin miedo di faya y miedo cu otro hende ta faya nos. E discipelnan a duda, nan tambe a haya miedo y a perde speransa. Nan no sa di e poder todopoderoso di nan Maestro Hesus. Nan no conoce ainda. .... 'Ta ken e homber aki ta? Hasta biento y lama ta tende di djE'(Marco 4, 41) nan a bisa. Nos tambe por scapa di un tormenta o un turbulencia den nos bida. Scucha Su Bos severo cu ta papia den nos curason, pa nos confia den djE, E Yiu di Tata.

Oracion: Señor Hesus, haci mi Fe mas grandi. Yuda mi. Proteha mi. Duna mi forza pa enfrenta tur problema cu un calma, paden den mi ser. Den e nomber prestigioso di Hesus di Nazaret. Amen.

Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado : Sorteo 21 Maart 2024 Merdia	
<b>CATACHI</b> Sorteo # 4216 1788 6850 2214 X2 BIG 4 Sorteo # 4216 2903 FP YFF Sorteo # 2272 5397 ZODIAC Sorteo # 4216 3015 Aquario LUCKY 3 Sorteo # 1090 828 X2	<b>LOTTO 5</b> Sorteo # Joker Letter Proximo Jackpot 140.000,-  <b>LOTTO DIA</b> Sorteo # Proximo Jackpot 53.000,-  <b>MEGA</b> Sorteo # Mega Ball Proximo Jackpot 290.000,- <b>Afl. 390.000,-</b>  <b>KORSOU</b> Sorteo # 

Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado : Sorteo 20 Maart 2024 Anochi	
<b>CATACHI</b> Sorteo # 8199 0877 2231 7597 FP BIG 4 Sorteo # 7243 8395 FP YFF Sorteo # 1948 7156 ZODIAC Sorteo # 6002 3641 Cancer LUCKY 3 Sorteo # 932 557 X2	<b>LOTTO 5</b> Sorteo # 2477 Joker 5 Letter I Proximo Jackpot 140.000,-  <b>LOTTO DIA</b> Sorteo # Proximo Jackpot 53.000,-  <b>MEGA</b> Sorteo # Mega Ball Proximo Jackpot 280.000,- <b>Afl. 380.000,-</b>  <b>KORSOU</b> Sorteo # 



# MINISTER DI CULTURA TA FELICITA TUR POETA PA NAN PARTICIPACION NA E EVENTO 'POETA DI PATRIA' DEDICA NA NOS PATRIA STIMA ARUBA



Recientemente, Minister Maduro di Cultura a presencia e evento 'Poeta di Patria,' na unda nos poetanan a deleita e publico presente na Fort Zoutman cu nan poema dedica na honor di nos Patria Aruba na ocasion di e celebracion di nos Dia di Himno y Bandera.

Tabata un anochi bunita, yena cu talento y creatividad di nos poetanan local, na unda Minister Maduro a tuma un rato pa recorda e poeta sra. Nena Ponson cu algun dia pasa a bay descansa den brasa di Señor. Sra. Nena semper a deleita publico cu su poemanan y su manera unico di declama esakinan na honor di Aruba. E mandatario a recorda tambe e aporte sin igual di sr. Atan Lee kende a cuminsa cu e evento bunita y importante aki na aña 2014.

Ganador absoluto di 'Poeta di Patria' a keda den persona di sr. John Freddy Montoya cu su poema 'Ki Bal'. Finalistanan a keda den persona di sra. Gilia Croes, sr. Luis Rodulfo, sra. Aurelia Croes y sra. Estefana 'Titi' Tromp-Gil.



Minister Maduro ta gradici Comision Celebracion Dianan Nacional, Departamento di Cultura y Fundacion Corector di Papiamento pa un otro evento 'Poeta di Patria' exitoso, y ta gradici tur participante pa nan aporte pa haci e evento aki uno grandi un biaha mas.



**PUEBLO A HAÑA SU PEN BEK**  
 Pa kualkier informacion  
 solodipueblo@gmail.com  
 of  
 ☎ 585-9500



# Polis a bay na Bushiri Residences pa un caso di destrucccion



Diaranson mainta a drenta informe di un caso di destrucccion na Bushiri, mesora a dirigi un patruya na e sitio. Na yegada di e patruya a bin compronde cu aki ta trata di un caso di destrucccion unda a destrui

e camara di seguridad di un cas. E motibo pa e destrucccion aki no ta conosi pero si e identidad di e destructor y pronto polis lo bay p'e destructor aki.

# Polis investigando caso di maltrato di pareha despues di cu dama agredi a yega warda di polis na Paardenbaaistraat

Diaranson mainta a drenta informe di cu un dama a presenta na warda di polis na Paardenbaaistraat pa denuncia cu su pareha lo a agredie y ta na un apartamento na Bushiri. Mesora a dirigi un patruya na e sitio pa bay atende cu e asunto. Polis a bay na e sitio



y a haya sa locual a sosode y a recomenda e dama pa e bay na recherche pa entrega e keho



## PRONOSTICO DI TEMPO

VALIDO TE DIABIerna 22 DI MAART 2024, 18:00 ORA

### TEMPO:

AWE TARDI Y AWE NOCHI: PARCIALMENTE NUBLA Y GENERALMENTE SECO DEN MARDUGA Y MAYAN: PARCIALMENTE NUBLA SIN AWACERO DI IMPORTANCIA

TEMPERATURA MAXIMO 32 GRADO CELSIUS

TEMPERATURA MINIMO 26 GRADO CELSIUS

INDICE DI CALOR (HEAT INDEX) DEN Y ROND

DI ORANAN DI MERDIA: 33 PA 38 GRADO CELSIUS

UV INDEX: 12

POTENCIAL DI AWACERO PA PROXIMO 24 ORA:

MENOS DI 1 MM; LOCALMENTE ESAKI POR TA DIFERENTE.

REGISTRACION DI TEMPERATURA (GRADO CELSIUS) Y

AWACERO (MM) DEN ULTIMO 24 ORA (8'AM PA 8'AM):

PRONOSTICO DI TEMPO PA PROXIMO 3 DIANAN:

PARCIALMENTE NUBLA, SIN AWACERO DI IMPORTANCIA.

BIENTO LO TA FOR DI DIRECCION OOST Y MODERA;

BASTA FUERTE TE FUERTE DEN RAFAGA. TEMPERATURA (GRADO CELSIUS)

MAX / MIN LO TA: 32 / 26



# HOROSCOPO

22 di Maart 2024

Feliz y productivo dia. Awe solo di pueblo ta presenta bo horoscop pa dia 22 di maart 2024.

### Aries

No acomoda bo mes, atende e demandanan di bo pareha. Fortuna y suerte ta di bo banda. E logronan alcanza na bo trabao ta satisface bo hopi. Dinamismo y energia ta yena bo bida. Number di suerte: 47, 79, 2.

### Tauro

Bo tin e tendencia pa comporta masha dushi dushi mes cu tur hende. Bo mester confronta un bon cantidad di gasto. Bo esfuersonan laboral lo wordo recompensa. Mas relajacion of e sistema nervioso lo hungabo un wega. Number di suerte: 19, 85, 8.

### Geminis

Den amor, lo bo logra loke bo kier. Beneficio economico danki n'e weganan di suerte. Bo trabao lo bay existi di bo un voluntad di hero. Den herida, por tin peliger di infeccion. Number di suerte: 22, 84, 6.

### Cancer

Bo ta hopi bon cu bo famia y amigo. Nan ta responde bo afirmativamente na un peticion di credito. Den trabao, planifica miho bo

tempo. Cana mas si bo no kier tin problema circulatorio. Number di suerte: 86, 16, 7.

### Leo

E konkistanan amoroso lo vislumbra. Despues di e preta economico di pasado, recapacita. Percura pa traha mas den team. Bo djentenan por causa bo problema; bay un dentista. Number di suerte: 41, 67, 4.

### Virgo

Lo bo conoce un persona cu lo haci bo hopi feliz. Un dia di 'ups and downs' economico. Busca novedad den trabao of lo bo cay den rutina. Bo ta dispone di reserva energetico, no gasta nan. Number di suerte: 52, 54, 1.

### Libra

Bo sernan keri kier yuda bo. Cu bo placa gespaar lo bo logra yega fin di luna mas relaha. Lo bo topa cu suerte den e area profesional. Keda cu e amigo ey cu bo no a mira pa asina tanto tempo, e lo relaha bo. Number di suerte: 64, 91, 3.

### Scorpio

Ambiente adecua pa topa cu amor nobo. Mal momento pa haci prestamo. Lo bo tin exito den bo estudio nan of na trabao. Cuidao cu e problemanan auditivo.

Number di suerte: 68, 65, 1.

### Sagitario

Orguyo lo haci cu lo bo aleha di bo pareha. E cuestionnan di placa ta atraves a un caida chikito. Lubida e preocupacionnan di tipo laboral, nan no ta existi. Bo dolornan por ta cos di tempo. Number di suerte: 35, 19, 8.

### Capricornio

Bo ta specialmente simpatico cu bo mayor y bo amigonan. Cu un golpi di suerte lo bo por aumenta bo entrada. Bo ta ilusiona pa cuminsa cu un proyecto laboral nobo. E problemanan di salud lo bay remiti pocopoco. Number di suerte: 14, 24, 9.

### Acuario


Lo bo tin encuentro cu algun persona cu hopi tempo bo no ta mira. Por siña biba cu menos placa. Bo imagen lo bay ta deteriora entre bo companeronan. No comete exceso cu cuminda. Number di suerte: 56, 13, 7.

### Piscis

Lo apetece bo ta cu bo famia y bo hendenan. Prudencia den e asuntonan di placa. Bon dia pa proyecto di trabao. E exceso di ehercicio no lo cay bo bon. Number di suerte: 48, 35, 9.



# DIA INTERNACIONAL DI MONDI: INNOVACION Y SOLUCIONNAN NOBO CU TA BENEFICIA MONDINAN



ORANJESTAD - Dia 21 di maart 2024 ta Dia Internacional di Mondin. Un dia dedica na eleva conscientizacion riba e importancia di tur tipo di mondi rond mundo. E tema pa 2024 ta "Mondinan y Innovacion". E tema di aña aki ta enfoca riba e rol crucial cu innovacion tin den maneho y conservacion di e mondinan. Tecnologia moderno por yuda nos monitor mondinan mas eficientemente, ta yuda pa detecta desasternan di candela den mondinan, ta yuda pa combati practicanan di rosamento di mondi y ta yuda desaroya metodonan sostenibel pa uzo di recursonan natural di mondinan. Aki na Aruba, Directie Natuur en Milieu (DNM) ta haci uzo tambe di diferente artefactonan innovativo manera tablet, drone, telefon celular, foto camera cu GPS, y software ArcGis. ArcGIS ta un sistema di informacion geografico (GIS) cu ta haci e maneho y analisis di data geografico posibel door di visualisa esaki y pone riba mapa. Tur esakinan ta facilita e trabounan necesario pa yuda sostene formulacion di consehonan y manehonan cu ta aporta na conservacion y protec-

cion di nos naturalesa y medio ambiente. Nacionnan Uni (UN) ta observa e dia aki como 'Internacional Forest Day'. Na Aruba, nos no conoce un palabra na Papiamentu cu ta referi na e palabra na Ingles 'forest'. Nos ta yama esakinan tur pa mondi. Pasobra na Aruba nos conoce un tipo di mondi so, cu ta clasifica pa 'Tropical dry forest'. Esaki ta nifica cu nan ta mondinan seco tropical cu scarcedad di awa. E mondinan aki ta haya nan den regionnan unda cu tin yobida un parti di aña, sigui pa un temporada largo di segura. E matanan y e vegetacion cu ta presente na un clima similar ta adapta bon na e realidad cu tin poco awa. Por bisa cu no ta haya nada di yobida pa casi shete luna. Pa motibo di e condicionnan dramatico aki, e ecosistemanan aki tin hopi especienan endemico cu a adapta na extremonan asina. Esaki tambe ta pone cu tin scarcedad na recursonan natural manera tin masha poco mata of sorto di bestia paso cu no tin suficiente cuminda pa e bestianan haya. Mondin ta cas pa mayoria di e biodiversidad terestre. Esakinan ta entre


otro especienan manera parha, mamifero y otronan. Mondinan ta vital pa sostene produccion di cuminda. Si nos ta planta mas y ta yuda pa crece mas mata, no solamente nos ta sostene produccion di cuminda pa humanidad pero tambe pa bestianan. Tambe por bisa cu espacio ta limita, esaki ta haci cu no por papia di 'forest' aki na Aruba. Aruba ta un isla, naturalmente cu espacio ta limita te hasta pa hende, pero poblacion ta keda crece. P'esey nos por bisa cu nos mondinan ta desapareciendo mas y mas. E poblacion mundial ta creciendo esaki ta nifica cu lo tin necesidad pa mas edificio pa tur. E material cu ta uzando pa construccion mayoria bez no ta sostenibel. Tin un yamada cu mester mas innovacion den material di construccion. Locual por mira den e informacionnan di conscientizacion di UN, ta conseha pa mas uzo sostenibel di e material palo pa construi cune. Scoge pa construi cu palo y incorpora mas mata den bo area di construccion di cas y edificio. Expansion di uzo di productonan cu ta bin di mondi manera palo, ta contribui na neutralidad di carbon den e medio ambiente. Pero tambe haci cambianan chikito den bida diario manera cambia bo skeiro di djente di plastic pa uno di palo. Asina tin menos impacto di desperdicio di plastic. E 6 motibonan cu UN ta duna pa duna mas balor na nos mondinan ta:

1. Mondinan ta cubri 31% di e superficie di tera na mundo.
2. Mondinan ta vital pa alcanza un sistema sostenibel di produccion di

cuminda cu ta bin di agricultura.

3. Mondinan y sector di 'forest' ta genera trabou pa mas o menos 33 miyon di hende.
4. Mondinan ta provee 75% di acceso na awa cu no ta contamina.
5. Mondinan ta warda y ta deposito di carbon. Mondinan ta contene mita di e cantidad global di carbon den suela y vegetacion. Mondinan ta recurso di palo sostenibel, usando esaki, ta mitiga cambio di clima.
6. Mondinan ta esencial pa conservacion di biodiversidad. E ta cas pa 85% di anfibionan, 75% es-

pecienan di parha y 68% di mamiferonan. Nos futuro ta depende di preservacion y maneho sostenibel di e mondinan cu ta existi. Mondinan ta fuente di bida, awa dushi, y di aire limpi. Dia Internacional di Mondin ta un recordatorio di e necesidad pa nos innova y desaroya solucionnan nobo pa proteha y restaura nos patrimonio natural, e Mondinan. DNM ta desea pa un y tur tuma tempo pa aprecia nos mondinan y tuma un accion, con chikito cu e ta, pa aporta y siña mas di con innovacion por contribui na un futuro mas sostenibel pa nos mondinan.



	7			6				9
6				5				8
		4					7	
	3				6			
2				5				8
				4				1
		3					4	
	2				7			3
1				8				2

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4



# Chauffeur yegando cu velocidad halto a bay dal riba auto para na crusada y riba un baranca



Diaranson mainta a drenta informe di un accidente

cu hende herida na Boegoeroei, mesora a dirigi tan-

to polis como ambulans na e sitio.

Na yegada di e patruya a bin compronde cu aki ta trata di un accidente unda cu e chauffeur di un Chevrolet Aveo biniendo cu un poco velocidad a brake pero a slip riba e santo riba caminda y ppa purba evita dal tras di Hyundai Santa Fe a dal esaki toch y a bay dal 2 piedra grandi y pushanan. Debi na e impacto un persona a resulta herida, na yegada di e ambulans nan a atende e victima.



# TEAM SERO BLANCO A BIRA SIGUIENTE VICTIMA!



Calabas/Kudawecha - Shonnan, diasabra ultimo, 16 di maart, un berdadero sambombaso di wega di domino tabatin na e palacio di plak piedra, e unico Domino Square Garden, aya n'e grens entre Calabas y Kudawecha. E dinamico "team to beat", esta Team Snor, bou liderasgo dje flamante "Snor" Perez hunto cu su "general tactico", Captain Magda, a pronostica cu Sero Blanco

Domino Team lo bira nan siguiente victima, pero shonnan, locual si nan no a pronostica ta cu esaki lo bira un "zware bevalling"! Team Sero Blanco a bay c'un berdadero ekipo 'mercenario' cu intencion

serio di corta Snor su bigote y ponele come esaki sin sao y sin peper! Ora bo wak cara di Nai Rasmijn ta milita den ekipo di domino, hala faha mara pasobra cos ta bay bira 'spannend'! E prome tanda a bay estilo un pa mi, un pa bo. Un rato Snor ta 'on top', un otro rato e ta 'den bottom', y asina ey e

wega ta preta-preta y dado momento Sero Blanco ta ariba cu 10-9! Team Snor ta grita "alle hens aan dek", y cu hopi lucha toch ta logra drenta halftime cu bentaha minimo di 11-10! Despues di a goza dje snacknan gratis, e bataya ta continua y Captain Magda ta man na cabes pasobra dos hungado di Team Snor mester a bay. Sero Blanco ta probecha di biaha y ta bay ariba cu score di 14-12! Ata! Otro hungado di Team Snor ta bula afo. Captain Magda ta drenta cushina y saca chef na horea pa bin yuda! Team Snor ta recupera

16-15. E bataya ta manera horcan cu ta coy forsa ora ta empata na 18-18, y un y tur presente por a sinti e atmosfera di presion y ansha! Sero Blanco ta manera tribon cu a hole sanger y ta bay den un "feeding frenzy"! Score ta bay 19-18 pa Sero Blanco. Angustia total ora Sero Blanco ta yega 'top of the hill' cu score di 20-18! Captain Magda un tin mas huña pa come y ta haci cambio desespera. Ata ... Snor ta corta bentaha na 19-20; un wanta di rosea mas, y Snor ta empata sensacionalmente na 20-20! Y ata, un biaha mas, tanten nochi no cera bina su careda un ta caba! Cu forsa di alivio total Snor ta grita "Binti-uuuun!", y dje forma aki ta caba ansha y susto di tur hungado y fanatico. Ambos ekipo ta brasa otro den un ambiente mutuo y di respet pa c'un berdadero bataya epico den e unico y mundialmente famoso Domino Square Garden!





# Chauffeur basta cansa a baha caminda y dal contra palo di lus na Tanki Flip



Diaranson madruga a drenta informe di un accidente na Tanki Flip, mesora a dirigi un patruya na e sitio.

Na yegada di e patruya a bin compronde cu un chauffeur basta cansa a yama amistadnan pa yud'e yega su cas y a bin com-

pañe pa e yega su cas pero net parida di e rotonde Tanki Flip asina mes ela baha caminda na man drechi y a bay dal riba un palo di lus. Polis a tuma datos di e accidente aki y afortunadamente ningun hende a resulta herida y e palo di lus no a ricibi mucho daño.

# Chauffeur di un van no a regula su velocidad ni a mantene distancia a bay dal tras di un Toyota Yaris



Diaranson mainta a drenta informe di un accidente na Indianenweg, mesora a dirigi un patruya na e sitio. Na yegada di e patruya a bin compronde cu un Toyota Yaris yegando e crusada cu Dominicanessenstraat a para pero e van su tras no a regula su velocidad ni a mantene distancia a bay dal tras di e Yaris y mand'e dilanti meymey di e crusada. Afortunadamente no tabata tin ningun auto ta bini cu lo a bin dal riba dje ni ningun hende a resulta herida

**BO SANGER TA SALBA BIDA!**

STICHTING BLOEDBANK ARUBA

587 0002  
StichtingBloedbankAruba

[www.bloedbankaruba.aw](http://www.bloedbankaruba.aw)

## CHAPI Y VERF HANDY MAN

Nos ta haci tur sorto di chapi y verf cas, edificio, school.  
Nos ta tira sushi afo.

**Cel: 561-1397**

**PUEBLO A HAÑA SU PEN BEK**

Pa kualkier informacion  
[solodipueblo@gmail.com](mailto:solodipueblo@gmail.com)  
of  
585-9500